

समां — 1815 Hrs.

तरीक — 20 अगस्त 2017

1. केन्द्री गृह मंत्री राजनाथ सिंह होरें आखेआ ऐ जे राष्ट्री जांच एजेसी दी कार्रवाईएं कारण जम्मू कश्मीर च पत्थरबाजी दिएं घटनाएं च खरी मती कमी आई ऐ।
2. रक्षा मंत्री अरूण जेटली होरें आखेआ ऐ जे सुरक्षाबलें अपनी सख्त कार्रवाईएं दे राएं कश्मीर च आतंकवादिएं उप्पर बड़ा मता दबदबा बनाई लैता ऐ।
3. अमरीका नै आखेआ ऐ जे पाकिस्तान गी एह् यकीनी बनाना लोड़चदा ऐ जे ओहदी धरतै दा इतेमाल आतंकवादी गतिविधिएं लेई नेई होऐ।
4. ग्रामीण विकास मंत्री अब्दुल हक खान होरें जम्मू च ग्रामीण विकास मैहकमे दी कारकरदगी दा जायजा लैता। उनें योजनाएं दी असरदार अमलावरी लेई नेड़मी निगरानी पर जोर भरेआ।
5. जीएसटी बवस्था दे तैह्त रिटर्ना भरने ते टैंक्सें दा भुगतान करने दी खीरी तरीक गी होर 5-एं दिनें लेई बघाई दित्ता गेआ ऐ।



Rajnath-NIA

केन्द्रीय गृहमंत्री राजनाथ सिंह होरें आखेआ ऐ जे राष्ट्री जांच एजेसी — एन.आई.ए. दे कारण गै जम्मू कश्मीर च पत्थरबाजी दिएं घटनाएं च कमी आई ऐ। उनें आखेआ जे सरकारै भारत दी सुरक्षा दा प्रण पाए दा ऐ ते इस लेई सख्त कार्रवाईयां कीतीआं जा'रदिआं न। श्री सिंह होर अज्ज लखनऊ च एनआईए दे दफ्तर ते आवासीय परिसर दा उद्घाटन करने परैन्त बोला'रदे हे। आतंकी संगठनें गी रपेआ-पैसा मुहैया करोआने आहले ज़रियें दे खात्मे पर जोर दिंदे होई उनें आखेआ जे जाली नोटें ते आतंकियें गी पैसा उपलब्ध करोआने आहले माध्यमें पर रोक लाने कन्ने आतंकवाद गी बड़डा झटका लग्गा ऐ। उनें आखेआ जे इस खेत्तरै च एन.आई.ए. बड़ा शैल कम्म करै'रदी ऐ। अपने केइएं ट्वीटें राएं श्री सिंह होरें आखेआ जे आतंकवादियें गी घन मुहैया करोआने दी साजिश च शामिल अपराधी, हून राष्ट्रीय जांच एजेसी —एन.आई.ए. दे नांS कोला

डरन लगी पे न। राजनाथ होरें आखेआ जे पूर्वोत्तर दे राज्यें च कट्टरवाद ते नक्सलवाद दिएं घटनाएं च खरी मती कमी आई ऐ।

<><><><><><>

Jaitley-Terrorism

रक्षा मंत्री अरुण जेटली होरें आखेआ ऐ जे सुरक्षाबलें सख्त कार्रवाईएं दे राएं जम्मू कश्मीर च आतंकवादिएं उप्पर बड़ा मता दबदबा बनाई लैता ऐ ते केन्द्र सरकारै इस गल्लै दा ध्येइया कीते दा ऐ जे सरहदी रिआसता च आतंकवाद गी भलेआं खत्म कीता जाग। उनें आखेआ जे बन्ने पारा थमां आतंकवादिएं ते राष्ट्र बरोधी कार्रवाई च शामिल धड़ें गी समर्थन ते शैह कारण कश्मीर दा मामला होर पेचीदा बनी गोआ ऐ। उनें आखेआ जे केई बारी आतंकवादिएं गी बचाने लेई घाटी च बड़डे स्तर पर पत्थरबाजी कीती जंदी ऐ। रक्षा मंत्री होरें कांग्रेस दी अगुवाई आहली यू. पी. ए. सरकार पर ज़बानी हमला बोलदे होई आखेआ जे उंदे कश सदियें पराने कश्मीर मामले गी हल करने लेई कोई ठोस नीति गै नेई ही। उनें आखेआ जे मोदी सरकारै आतंकवाद गी भलेआं खत्म करने दा प्रण पाए दा ऐ।

<><><><><><>

Add-Jaitley

केन्द्री खजाना मंत्री अरुण जेटली होरें अज्ज आखेआ ऐ जे नोटबंद दे बाद देसै दे बक्ख-बक्ख हिस्सें च मोओवादिएं ते जम्मू कश्मीर च अलगाववादिएं गी थहोने आहले फंडें च खरी मती कमी आई ऐ। उनें आखेआ जे नोटबंदी परैन्त पत्थरबाजी दिएं घटनाएं च बी बड़ी कमी दर्ज कीती गोई ऐ। उनें आखेआ जे नोटबंदी शा पैहले हजारें दी तादाद च पत्थरबाज प्रदर्शन लेई किट्ठे हुंदे हे पर हून 25 पत्थरबाज बी मुश्कलें गै बरोध प्रदर्शन लेई किट्ठे होआ'रदे न। श्री जेटली होर अज्ज मुंबई च इक समारोह दौरान बोला'रदे हे।

<><><><><><>

US-Pak

अमरीका दे इक वरिष्ठ जनरल नै आखेआ ऐ जे पाकिस्तान गी एह गल्ल यकीनी बनानी लोड़चदी ऐ जे ओहदी धरतै दा इस्तेमाल कुसै गवांडी मुल्खै खलाफ आतंकवादी हमले लेई नेई होऐ। अमरीकी सेंट्रल कमान दे कमांडर जनरल जोसेफ वोटेल होरें इस हफते अपने पाकिस्तान दौरे दौरान एह गल्ल आखी। इस्लामाबाद च अमरीका दे राजदूती दफतरै इक बयाना च आखेआ

ऐ जे जनरल जोसेफ होरें इस गल्लै पर जोर दित्ता ऐ जे पाकिस्तान च सब्भनें पार्टिएं गी एह यकीनी बनाना लोडचदा ऐ। अपने दौरे दौरान उनें प्रधानमंत्री शाहिद अब्बासी, रक्षा मंत्री खुर्रम दस्तगीर ते सेना प्रमुख जनरल क़मर जावेद बाजवा हुंदे'नै बी गल्लबात कीती।

<><><><><><>

Wani-Custody

नजैज धनै गी जायज बनाने आह्ले केई दहाके पराने इक मामले च गिरफ्तार कीते गेदे कथित हवाला कारोबारी मोहम्मद असलम वानी गी अज्ज दिल्ली दी इक अदालतै न्यायिक हिरासत च भेजी दित्ता ऐ। प्रवर्तन निदेशालय पाससेआ हाजिर होए दे वकील एन.के. मट्टा दिआं दलीलां सुनने परैन्त ड्यूटी मैजिस्ट्रेट जसजीत कौर होरें वानी गी न्यायिक हिरासत च भेजी दित्ता। प्रवर्तन निदेशालय दे इक अधिकारी नै गलाया जे 36एं ब'रें दे वानी गी रियासती पुलसा दी मदाद कन्ने श्रीनगर थमां गिरफ्तार करियै मगरा दिल्ली आहननेआ गेआ हा।

<><><><><><>

Naqvi-Reservation

सरकारै नवोदया किस्मै दे 100 विद्यालयें च कुड़िएं लेई 40 फीसद आरक्षण दा फ़ैसला लैता ऐ। अल्पसंख्यक मामलें दे राज्यमंत्री मुख्तार अब्बास नकवी होरें आखेआ ऐ जे सरकार देसै दे अल्पसंख्यक आबादी आह्ले इलाकें च नवोदया किस्मै दे 100 विद्यालय खोलने बारै विचार करै'रदी ऐ। श्री नकवी होरें आखेआ जे एह आरक्षण अल्पसंख्यक समुदाय दे विद्यार्थिएं लेई खड्ढेरे जाने आह्ले 5 उच्च शिक्षा संस्थानें च बी लागू होग। नकवी होरें आखेआ जे एह स्कूल अगले ब'रे सोआं शुरु होई सकदे न।

<><><><><><>

Haq-RDD

ग्रामीण विकास ते पंचायती राज मंत्री अब्दुल हक होरें अपने अधिकारिएं ते कर्मचारिएं गी निर्माण कम्मं दी निगरानी बदाने लेई आखेआ ऐ तां जे कल्याणकारी स्कीमें गी प्रभावशाली ढंगा कन्ने अमल च आंदा जाई सककै। मंत्री होर ग्रामीण विकास विभाग दी जम्मू डिवीज़न दे कम्मकाज दा जायज़ा लैने आस्तै लाई गेदी मीटिंग च बोलारदे हे। उनें आखेआ जे लोकें दी समस्याएं गी सुनने आस्तै, विभाग दे अधिकारी उपलब्ध रौहन ते ग्राम सभाएं दा आयोजन करीए, सब्भने दी शम्हूलियत गी यकीनी बनाया जा। मंत्री होरें बक्ख-बक्ख स्कीमें तैहत हासिल उपलब्धीएं दा

जायजा लैता ते स्वच्छता, नरेगा ते सुविधाएं दे निर्माण आले कम्में गी तालमेल कन्नै कराने लेई आखेआ। मंत्री होरें आखेआ ते ग्रामीण विकास दे कम्में गी पारदर्शी ते भ्रष्टाचार मुक्त ढंगा कन्नै कीता जा। उनें रियास्ता च मनरेगा दी कामयाबी पर भी लौ पाई।

<><><><><><>

GST-Date

GST तैहत रटर्न दाखिल कराने ते टैक्स अदा करने दी आखरी तारीख 5 दिन बदाई गई ऐ। जुलाई म्हीनें दी पैहली GST रटर्न भरने दी, इआँ, अज्ज आखरी तारीख ही। हून एह रटर्न, इस म्हीने दी 25 तारीख तककर भरी जाई सकदी ऐ। वित्त मंत्रालय दी इक सूचना मुजब, किश हाड़ पीड़ित राज्यें ते जम्मू-कश्मीर नै, आखरी तारीख अगड़ी करने दी मंग कीती दी ही। एहदे अलावा GSTN पोर्टल पर भारी दबाव होने करी तकनीकी समस्यां भी ऐहीआँ। जेड़े करदाता, Form TRANS-1 भरीऐ, पिछले टैक्सें दा भुगतान चाहन्दे न, उंदे लेई रटर्न दाखिल करने दी आखरी तारीख 28 अगस्त ऐ।

<><><><><><>

Rajiv-Anniversary

साबका प्रधानमंत्री राजीव गांधी हुन्दी 73मीं जयंती पर, उनें'गी चेत्ता करदे होई साबका राष्ट्रपति प्रणव मुखर्जी, कांग्रेस प्रधान सोनिया गांधी, कांग्रेस दे उप-प्रधान राहुल गांधी, दिल्ली दियां साबका मुख्मन्त्री शीला दीक्षित ते प्रियंका गांधी वाडरा होरें, राजीव गांधी हुन्दी समाधि पर जेईऐ फुल्ल चाढ़े। इस सरबंघै च केई कार्यक्रम कीत्ते जारदे न। ओ 31 अक्टूबर 1984 थमां 2 दिसम्बर 1989 तककर देश दे प्रधानमंत्री रेह, ते 21 मई 1991 गी, श्री पेरुम्बुदूर तमिल नाडू च उंदी हत्या होई गई।

<><><><><><>

PM-Rajiv

प्रधानमंत्री नरेन्द्र मोदी होरें अज्ज साबका प्रधानमंत्री राजीव गांधी हुन्दी जयंती पर उनें'गी चेत्ता कीता। राजीव गांधी हुन्दा जन्म अज्जै दे दिन 1944 च होआ ते 21 मई 1991 गी उंदी हत्या करी दित्ती गई। प्रधानमंत्री मोदी होरें अपने ट्वीट च राजीव गांधी ते उंदे योगदान गी चेत्ता कीता।

<><><><><><>

Speaker-Youth

विधान सभा दे स्पीकर कवींदर गुप्ता होरें Teen Fashion Icon मुकाबला जितने आले अनमोल शर्मा गी कल सम्मानित कीत्ता ते ओदे कामयाब भविक्खै दी कामना कीत्ती। जम्मू-कश्मीर Medical Employees Federation आस्सेआ कराए गेदे समारोह च अनमोल शर्मा गी Mr. Teen Fashion Icon 2017 ते Mr. Teen India First Runner Up 2017 दे खिताब जितने लेई सम्मानित कीत्ता गोआ। स्पीकर होरें इस मौके पर आखेआ जे जम्मू-कश्मीर दे नौजवान, बक्ख-बक्ख खेत्तरें च नाँ कमाईऐ कामयाबी हासिल करारदे न। उनें, नौजवान पीढी दी समर्थ पर पूरा विश्वास दस्सेआ ते नौजवानें गी अपील कीत्ती ते ओ अगगै औन ते सरकार दी बक्ख-बक्ख योजनाएं दा फायदा लैन।

<><><><><><>

Sham-PHE

PHE ते हाड़ें दी रोकथाम दे मंत्री शाम लाल चौधरी होरें कल अखनूर इलाके च प्रताप नैहर दे मुरम्मत सुधार दे कम्मै दा जायजा लैता। उनें, इस कम्म गी युद्ध स्तर पर पूरा करने दे निर्देश दित्ते। मंत्री होरें देवा, मैरा मुट्ठी, ते मावा ब्राह्मणा खड्ड च लग्गे दे मुरम्मत सुधार दे कम्म दिक्खे ते अधिकारिणं गी फौरन कम्म पूरा करीऐ प्रताप नैहर च पानी छोड़ने लेई आखेया। उनें लोकें गी समस्याएं गी सुनेया ते हाड़ दे पानी कन्ने उ'दी फसलें गी पुज्जने आले नुक्सान गी रोकने दा यकीन दोआया। मंत्री होरें मुकामी लोकें कन्नै गल्लबात कीत्ती ते खरीफ दी फसल गी बचाने दे उपाएं बारै दस्सेआ। मंत्री होरें अधिकारिणं गी नैहर पर तक्क रखने लेई भी आखेआ, तां जे कुसे'गी भी, पानी बदनै बेल्ले पोशानी नेई बनै। मगरा मंत्री होरें परेड जम्मू च मुरम्मत सुधार कीत्ती दी पानी सप्लाई स्कीम गी जम्मू शैहर दी जनता गी समर्पित कीत्ता। एहदे पर साड्डे 14 लक्ख रूपए खर्च होए न।

<><><><><><>